

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Ua viivii te fenua i raro a'e i te taata ra; ua hapa ratou i te ture ra; ua ruri-ê-hia e ratou tei haapaohia ra; ua pi'o ratou i te faufaa haapao-tamau-hia ra.” Isaia, 24: 5.

Nu. 2.

Febuare, 1913.

Mat. 6.

“Ua Ruri-ê-hia e Ratou Tei Maapaohia ra.”

ME pahono maira te Veia Katolika i te hoê parau, i nenei-hia e matou, oia hoi, te “Amuraa Maa a te Fatu, e te na ô mai nei ratou e, e toru parau hape rahi i papaihia, e na ratou e faatitaifaro i taua na parau e toru ra. Te na ô mai nei ratou e, “Te tino mau no Iesu ia te Euhari”, e ua taio maira ratou i te tahi mau hororaa, mai te mana'o e, e tauruhia ratou i to ratou tiaraa hape rahi roa.

E haamana'o tatou i teie, i te reira iho â taime, ta Iesu e ta'na ra mau pîpî i amu ra i taua amuraa maa ra, tei reira o Iesu iho ma to'na tino e to'na toto, e te tino ahuru ma piti atoa ra. I taua taime ihora, ua haamaitai mai o Iesu iho i te pane, e te au'a atoa, e ua na ô maira oia e, “O tau tino teie e horoahia na outou nei”; e “Teie nei au'a, o te faufaa apî ia i to'u nei toto, e haamaniihia no outou nei.” I taua taime ihora, ua amu anei o Iesu i to'na iho tino, e ua inu anei oia i to'na ihora toto? Ua amu anei te mau pîpî i reira i te tino mau o Iesu, e ua inu anei ratou i to'na toto mau? Eiaha roa ia; o te hoê teie o te mau fabula i parauhia e Paulo. “E fariu ê hoi to ratou tari'a i te parau mau, a

opai tia'tu ai i te fabula." Timoteo II, 4: 4.

Te taio mai nei taua Veā Katolika ra i te hororaa, o te na ô mai nei e, "E hinaaro rahi roa to'u i te amu i teie nei pasa, o vau e o outou atoa i mua i to'u pohe-roa-raa", e ua na ô mai taua vea ra i te feruri, "Mai te mea ra e, e amuraa pane ana'e teie, eaha o Iesu i hinaaro rahi roa'i? Ua amu pinepene oia i te pane, oia e te mau Apotolo." E amuraa ra ê roa teie i te mau amuraa maa noa, e ua haapaohia teie nei oroa apî ei haamana'oraa, e ei faaiteraa hoi i to'na pohe-raa, e ia haamau hoi ratou i te haapao i teie nei peu apî, ta'na i haapii atu ia ratou ra, e tae noa'tu i te tau e tae mai oia ra. Ua au roa teie i ta Paulo i haapii mai: "E oti a'era ia'na te haamaitai i te Atua, vavahi ihora, na ô atura, A rave mai, a amu; o tau tino teie e ofatihia no outou nei; e na reira outou ei mana'oraa ia'u. E ua na reira atoa hoi i te au'a, ia oti a'e ta'na amuraa, na ô atura, Teie nei au'a, o te faufaa apî ia i to'u nei toto, e na reira outou ia inu ei mana'oraa ia'u. Ua amu ana'e outou i teie nei pane, e ua inu ana'e i teie nei au'a, ua faaite â ia outou i te pohe o te Fatu, e tae noa mai oia ra." Korinetia I, 11: 24-26.

E teie nei ia ite te mau taata'toa, e ia ore ratou e varihia i taua mau haapiiraa hairesi, e taio tatou i ta Iesu iho parau, o te na ô maira e, "E faaite atu vau ia outou, Teie au a ore a inu faahou i to roto i te vine, e tae noa'tu i te mahana e inu ai au e outou atoa i te uaina apî i te basileia o tau Metua ra." Mataio, 26: 29. Eaha tei inuhia i taua amuraa maa ra? E uaina tei inuhia ra, e o te inuraa uaina hopea teie ta Iesu i inu, e ua faaite papu mai nei oia e, e ore oia e inu faahou i te uaina, e tae noa'tu i te mahana e inu ai oia i te basileia o te Atua.

Te parau faahou nei matou, mai ta matou i parau i te matamua, oia hoi, aore roa ia te Oroa a te Fatu no te matararaa i te hara. Atira noa'tu te otoheraa faufaa ore o te Veā Katolika. Eita roa e tia ia ratou ia faaite mai i te hoê hororaa, o tei haapii mai e, o te Amuraa Maa a te Fatu, no

te matararaa hara ia. Teie râ, te haapii papu mai nei Paulo i roto i ta'na episetole i te Feia Mo'a i Korinetia e: "E teie nei, o te amu i teie pane, e o te inu i te au'a a te Fatu ma te au ore ra, e hara ia i te tino e te toto o te Fatu. 28 E hi'opoa maite râ te taata ia'na iho, a amu ai oia i taua pane ra, a inu ai i taua au'a ra. 29 O tei amu hoi e o tei inu ma te au ore ra, ua amu ia e ua inu i te pohe no'na iho, oia aore i hi'o i te tino o te Fatu ra. 30 No reira i rahi ai te pohe ma'i e te paruparu i roto ia outou na, e i taoto ai hoi e tahi pae." Korinetia I, 11: 27-30.

Ahiri ua farii to tatou mau hoa Katolika i te Evanelia mau, ua ite ratou e, o te bapetizoraa ra, no te matararaa hara ia; eiaha te Amuraa Maa a te Fatu ra. E rave rahi te mau parau faufaa ore a taua vea ra, eiaha râ te reira e ferurihia i teie nei.

Te faaite mai nei te Vea Katolika e, o to ratou haapiiraa, o te haapiiraa ia a te mau Aposetolo, aita râ matou i ite i te reira, e ia imi matou i roto i te mau parau mo'a, e haapiiraa ê roa ta matou i ite ra. I te matamua, oia i te taime i faatiahia te oroa e te Mesia iho, ua faaamu oia i ta'na mau pîpî i te pane, e ua faainu atoa hoi ia ratou i te uaina, e ua tamau noa ratou i te haapao maite i taua oroa ra, mai ta'na i haapii ia ratou. Ua amu ratou, e ua inu atoa hoi, eiaha ma te tapea i te tahi pae, oia hoi te uaina, na te mau orometua ana'e ra, mai te faahapa papu i te faaue, o tei na ô mai-ra e, "Ua rave ihora oia i te au'a, haamaitai atura i te Atua, na ô atura, A rave mai i teie a tufa na outou." Luka 22: 17. A hi'o atoa i Ioane 6: 53. I roto i taua irava ra, ua faaite papu mai nei o Iesu e, ia ore te taata e amu e ia inu atoa hoi, aore e ora i roto ia ratou.

I te matamua e mea nehenehe, e te papu te raveraa i te oroa, i teie nei râ, e mea fifi rahi roa te raveraa o taua ekalesia taiva ra. Ua faateiaha ratou i taua oroa nehenehe i te mau peu faufaa ore rahi roa, e ua faarirohia ia, mai te tahi mau teataraa i te huru. I te matamua e mea papu te auraa

mau o taua oroa ra, oia hoi e haamana'oraa ia; i teie nei râ, ua haapourihia i te mau tatararaa ê roa e te aro rahi.

Te vai atu â te mau parau e au i teie nei upoo parau, mai te faaite i te mau tau, i faahuru-ê-hia'i teie nei oroa rahi e te faufaa, eiaha râ matou e faaite atu, no te mea e ere ia to matou hinaaro ia faatupu i te mârô e te peapea; aita'tu hinaaro maoti e faaite hua i te Evanelia e tia i te vairaa ra. E ere ia ta matou peu ia mârô atu i te mau vea e te mau taata, ua mauruuru râ matou ia parau mârũ noa'tu.

—FARANI FULUMARE.

O te hoê tumu teie i haapao ai matou i te Oroa a te Fatu, i te mau mahana a te Fatu, oia hoi i te mau Sabati atoa ra. Ua na ô mai nei te Atua i te faaue mai:

“Ia haamaitai atu oe i te Fatu ra i to oe Atua i te mau mea atoa ra. E horoa atu oe i te hoê tusia i te Fatu ra i to Atua mai te parau-tia; oia hoi i te aau haehaa e te mana'o taia. E ia tia maitai ia oe iho eiaha ia viivii i to te ao nei, e haere oe i te fare pureraa i to'ura mahana mo'a a pupu atu ai i ta oe ra tusia; oia mau hoi o te mahana teie i faataahia ia faaea oe i ta oe ra mau ohipa, e ia haamori oe i te Tei Teitei ra; ia afai-atoa-hia râ ta oe ra mau opuaraa mai te parau-tia i te mau mahana atoa, e i te mau taime atoa e haamana'o râ oe e i teie nei mahana, te mahana a te Fatu, e pupu ai oe i ta oe ra mau tusia, e i ta oe ra mau oroa ia'na i te Tei Teitei ra, mai te fai i ta oe ra mau hara i to oe ra mau taeae, e i mua i te aro no te Fatu.” B. F. S. 59: 2.

Ua amui pinepine te ati Nephi mai te haapao i te Oroa a te Fatu. A hi'o i Moroni 6: 6: “E ua amui pinepine ratou ia rave i te pane e te uaina, ei mana'oraa i te Fatu ia Iesu.” Te na ô atoa mai nei te Atua: “E mea tia ia tai-ruru te Ekalesia, mai te amu i te pane e te uaina, ei haamana'oraa i te Fatu ia Iesu.” B. F. S. 17: 22.

Te Parau Tuatapapa no
Iosepha Semita.

(TUATIRAA.)

PENE XXIX.

MATAHITI 1838.

Ua haavare ihora Hinakele, e tuu atura oia ia Iosepha, e tahi mau taeae i roto i te rima no te hoê pupu enemî. Faaue atura te pupu enemî ia pupukihia ratou. Hamani-ino puai roa'tura te enemî i te Feia Mo'a i Fa Wese. A'o atura Iosepha i to Inidipenideni. Ua afaihia te mau taeae i te oire ra, i Richmond, e haavâhia. Te haavâ-raa haavare, e te tapearaa i te mau taeae.

I ROTO i teieni tau peapea ra i Misouri, haavî ihora Sâtani i te tahi mau taata toroa no te Ekalesia. Ua taiva ihora o Toma B. Marasa, te peresideni no te pŭpŭ ahuru ma piti Aposetolo, i te faaroo, e amui a'era oia ia Viliamu E. MaKelena, e te tahi atu â mau taata, o tei faarue i te faaroo, i te faaino noa ia Iosepha, e i to te Ekalesia paatoa.

Ua iteahia e Sâtani te mau taata e rave rahi, o tei mau-ruuru roa i te tauturu atu ia'na, i roto i te tama'i rahi ta'na i faatupu, e ua riro ia te mau taata rahi no te fenua ei mau mauhaa na'na ra. Ia ani atura te Feia Mo'a i te tavana ra, ia Boga, ia tauturu atu ia ratou, i te taima i haaputuputu mai ai te enemî e ati noa'e i De Wita, parau atura oia ia ratou e, tei rotopu ia te peapea i te mau Moromona e to ratou mau enemî, e na ratou iho e haapao i te reira; area râ ia faaite atura te Feia Mo'a e, e tama'i atoa ratou no to ratou mau ora, tonono ihora oia i te mau nuu atoa i raro a'e ia'na ia haamou roa ia ratou ra, e te mau taparahiraa i Hauna Mila ia te haamataraa no te reira ohipa ino.

I te mahana no taua mau taparahiraa ra, haere atura te enemî i Fa Wese, e faatia i to ratou puhapa i rapaeau i te oire. E poipoi a'era, hopoikia'tura te hoê reva uouo i te

oire, e haere atura o Hinakele, raatira, e farerei atu i te reira. Ia ho'i faahou maira oia, parau atura oia ia Iosepha e, hinaaro ihora te enemi ia haere oia e te tahi atu mau taata toroa, i to ratou puhapa i taua pô ihora, e e tamata ratou i te faatupu i te hau. Faatia ihora te mau taeae; ia tae atura râ ratou i te puhapa no te enemi, ua iteahia e, parau haavare iho â ta Hinakele, raatira, i parau atu ia ratou ra, e parau atura oia i te enemi e, "Teie te mau taata ta'u i parau ia tuu atu ia outou na." Ou'au'a ihora te mau enemi paatoa ma te oaoa rahi, mai te mana'o e, ua rave ratou i te hoê ohipa maitai.

I te poipoi i muri iho, ua haavâhia ratou, e tei roto i te haavâraa e hoê ahuru ma hitu orometua no te mau haapao-raa êê. Aita i faatiahia ia parau atu Iosepha ma i te hoê parau, ei parururaa ia ratou iho, area i faauehia ia pupuhia ratou i te poipoi i muri a'e, i nia i te mahora no te hau, i Fa Wese. Ua na ô atura o Doniphana, raatira, taparahi taata mau ia te reira, e e ore roa oia e tauturu atu ia ratou ra.

I taua mahana ihora, faaue atura o Lucasa, raatira, ia horoa mai te Feia Mo'a i ta ratou mau mauhaa tama'i e hope roa'e, e haapao ihora ratou. Ei reira e mea puai roa to ratou hamani-ino-raa'tu i te Feia Mo'a. Haere atura ratou i roto i te oire ma te mâta'u ore, no te mea ua ite ratou e, aita ta te mau taeae e hoê pupuhi. Ua haru ratou i te mau mea i roto i te mau fare, e pupuhi ihora ratou i te mau taata. Ua pupuhi-atoa-hia te hoê vahine, e ua ino roa'tu te hamani-ino-raa-hia no te mau vahine e rave rahi i te pohe.

Aita i pupuhia te Peropheta e ta'na ra mau taeae, no te mea hinaaro ihora o Lucasa ia faaite atu i ta'na mau tîti rahi i roto i te mau mataeinaa. Ua faataa-ê-hia râ ratou i ta ratou mau utuafare, a oto noa'i te mau vahine, e te mau tamarîi, mai te mana'o e, eita ratou e farerei faahou. Ua afai atura o Lucasa ia ratou i te mataeinaa ra, i Iaketoni, e tae atura ratou i reira i te mahana 4 no Novema. Ua fare-reihia ratou i Inidipenideni e te hoê nahoa rahi roa, e uihia

atura te tahi mau uiraa i te Peropheta. Tia maira oia i nia i taua poipoi Sabati ra, e a'o u'ana'tura oia i te tahi parau i nia i te mau parau matamua no te Evanelia. Na teie i faa-tupu i te hoê tohuraa, ta Iosepha i tohu atu i te tahi na avae i mua'e i te reira. Ua parau atura oia e, e a'o atu te hoê Peresibutero i te mataeinaa ra, i Iaketoni, i mua i te hopea no te matahiti 1838, e oia mau atura. E rave rahi te mau taata, o tei haere atu e faaroo i te mau a'oraa na te mau taeae i roto i taua na mahana ra.

Ua faarirohia o Calaka ei raatira no te mau faehau, e feii ihora oia ia Lucasa, no te mea ua na mua Lucasa i te tae atu i Fa Wese, e ua noaa ia'na te tîti rahi, oia hoi te Peropheta, e no reira faaue atura oia, ia afai-vave-hia te mau tîti i Richmond, i te mataeinaa ra, i Re. Haapao ihora na enemi e tootoru, e haamata ratou i te afai atu i ta ratou na tîti e toohitu i Re, area râ a haere atu ai ratou, inu noa ratou i te ava, e aita i mahia taero roa ihora, e aita i tia ia ratou ia haapao ia ratou iho. Rave a'era Iosepha ma i ta ratou mau pupuhi, e te mau puaahorofenua, e haapao ihora i te reira, ia ora faahou ratou. E mea ohie roa ia haere tiamâ atu te mau taeae, hinaaro ihora râ ratou ia haavâhia, ia faaitchia'tu to ratou hapa-ore-raa i te ture. Ia tae atura ratou i Re, ruuruuhia ihora ratou i te mau fîfi, e faaroo noa a'era ratou i te mau tuhi, e te mau parau faufau na te mau tia.

Ua parau atura o Pare P Paraita e, I te hoê pô, a faa-ite noa'i teie nei mau taata faufau i to ratou haruraa, e te faainoraa'tu i te mau vahine, e te mau tanahine na te mau taeae, e i to ratou taparahiraa'tu i te mau taata, e te mau vahine, e te mau tamarii atoa hoi, tia a'era Iosepha i nia, e parau u'ana'tura oia ia ratou, ma te hoê re'o puai roa, na ô atura:

"A mamû! E mau taata faufau no hade e! I roto i te i'oa o Iesu Mesia, te faahapa'tu nei au ia outou, e te faaue atu nei au ia outou na ia mamû noa. E ore roa vau e ora i te hoê minute e faaroo i te parau, mai te reira i te huru. A faaea i te reira huru parau, e aore râ e pohe tatou i teie nei iho â taime."

Ua faaea Iosepha i te parau, e tia ihora oia ma te hanahana, e te

mana rahi. Ua ruuruuhia oia i te fifi, e aita roa ta'na e hoê mauhaa, tia a'era râ oia ma te mâta'u ore, mai te hoê melahi i te huru, e hi'o atura oia i te mau tiaï, a rurutaina noa'i ratou i mua ia'na. Ua ani atura te mau tiaï ia faaore Iosepha i ta ratou hara, e ounu ihora ratou, e parahi noa a'era, mai te mamû noa, e ao noa'e te rui, ia monohia'i ratou e te tahi atu mau tiaï.

I muri a'e i to Iosepha ma afai-raa-hia e Lucasa i Inidipenideni, haere atura Calaka, raatira, e e piti tausani faehau i Fa Wese. Faaue atura Calaka ia tia te mau taeae e hope roa'e, i pihaiho te tahi i te tahi, i mua ia'na. Ua ravehia ta ratou mau mauhaa tama'i, e no reira aita i tia ia ratou ia paruru ia ratou iho. Tapea ihora Calaka e pae ahuru ma ono taata, e faaue atura oia i te mau taata toe ia faaineine i te faarue ê atu i Missouri. Parau atura oia ia ratou e, e mea faufaa ore ia tiaï noa ratou i te ite faahou i ta ratou mau arataï, no te mea ua papu roa to ratou hopea. E muri a'era, faaue atura oia i te mau taeae ia papai atu i to ratou mau i'oa i nia i te tahi mau parau, i te horoaraa'tu i to ratou mau fenua i te enemi, ia haapee atu i to te enemi mau tarahu.

Ua tonohia'tura o Wilisona, raatira, i Adamu-onidi-Ahmana, e tuu atura oia i te tahi mau tiaï e ati noa'e i taua vahi ra. Tapeahia ihora te mau taeae, e haavâhia ratou i roto i te hoê haavâraa, o Adamu Balaka ia te haavâ. Ua iteahia e, aita ratou i hapa i te ture, e no reira aita ratou i faautuahia. Faaue atura o Wilisona ia haere ê atu te Feia Mo'a paatoa i te mataeinaa ra, i Daviesa, i mua i na mahana e hoê ahuru.

Ua haere atura o Calaka, e ta'na na tîti e pae ahuru ma ono, i Richmond, i te mataeinaa ra, i Re, e farerei ia Iosepha e ta'na ra mau hoa i tapeahia i reira. Te huru, ua papu roa ia'na to ratou hopea, no te mea na ô atura oia i ta'na ra mau faehau: "E mau taata e, e pupuhi atu outou i te mau arataï no te mau Moromona i te mahana Monere i muri nei, i te hora vau i te poipoi". E haapii ture roo maitai râ oia, e ua ite oia e, e mea tia ore roa te reira, e no reira imi noa'tura oia i roto i te tahi na mahana, ia iteahia te tahi mau mea au

ore i te ture i ravehia e te mau taeae. I roto i te hoê leta, ta'na i papai atu i te tavana, parau atura oia e, ua rave ratou i te mau huru hara atoa, area râ e parihia ratou i te taparahi taata.

Ua haapaohia te hoê haavâraa haavare i roto i na mahana e hoê ahuru ma ono, e i te hopea, faatiamâhia ihora te mau taeae paatoa, maori râ e hoê ahuru ma hoê, e tei rotopu ia ia ratou o Iosepha, e o Haeramu, e o Sidine Ritidone, e o Pare P. Paraita. O Ausina Kiga ia te haavâ, e farii noa ihora oia i te mau parau haavare na te enemî. Ua anihia te mau taeae ia faaite atu i ta ratou mau ite no te haavâraa, e faaite atura ratou e pae ahuru taata, e tonohia ihora o Bogarata, raatira, ia afai mai ia ratou ra. Ia iteahia râ teie nei mau taata, i faaitehia ei mau ite na te mau taeae i roto i taua haavâraa ra, hurihia ihora ratou i roto i te fare auri, e aita i faatiahia ia tauturu maite hoê taata i taua mau tîti ra.

I teie nei taime, e mea ino roa te huru no te Feia Mo'a. Ua tapeahia Iosepha e ta'na na tauturu, o Sidine raua o Haeramu, i roto i te tapearaa i Libereta, e te huru, te tiaï noa ra ratou i to ratou poheraa. Tei roto ia o Pare P. Paraita, te hoê Aposetolo, i te fare auri i Richmond. Ua taparahihia Davida W. Patena, e taiva ihora o Toma B. Marasa, e o Viliamu E. MaKelena, e te tahi atu na Aposetolo, i te faaroo, e riro a'era ratou ei na enemî ino roa i te Ekalesia. Ua faaue atura te tavana no Missouri ia taparahi atu te mau faehau i te mau Feia Mo'a e hope roa'e. Ua fatata roa i te tau toetoe, e ia haere faahou atura ratou e imi i te faaearaa apî e tia'i.—OLE PETESONA.

(E tuatihia mai teie parau.)

“No reira, te mau mea maitatai atoa ra, no ô mai i te Atua ia; e te mea ino, no te diabolô mai ia; e enemî hoi te diabolô i te Atua, e te tama'i noa maira ia oia ia'na, e te parau maira e te taparu noa maira oia ia rave i te hara e te mea au ore ra.” Buka a Moromona; Moroni, 7: 12.

Te Mau Parau Api.

U A tae te hoê parau na nia i te parau reva mai te fenua ra i Amerika, e tae roa i te fenua Purutia. E mea maere rahi roa teie.

Te tama'i noa ra te mau orurehau i Mexico, e aita hoi e ravea no te Hau ia faahau ia ratou. E fenua peapea roa taua fenua i teie nei matahiti, e ua tausani te taata i pohe roa i taua orure hau.

Tei Milwakée, i Amerika, te hoê piifare huru ê roa. E' piti ahuru e ma ono monimoni avae to'na, e hoê ahuru ma maha monimoni avae i mua, e ahuru ma piti monimoni avae i muri, e mea roroa hoi to'na mau maiuu atoa. Ua huru au te avae no taua piifare iti i te avae o te mau taiga oviri i te rahi.

E ma'i iti rahi to te hoê tamahine, e ua mamae noa to'na opu. E peu ia no taua tamahine ia rave i to'na rouru i to'na vaha, mai te amu noa te huru. No to'na ma'i ino roa, ua tâpû te mau taote i to'na opu, e inaha tei roto i te vairaa no te maa te hoê poro rouru, mai te rima te rahi. Ua ora taua tamarii i teie nei.

Ua pohe a'enei te Tonitere no Amerika i te fenua ra, i Beritane, e na taua hau ra i faauta i taua tino pohe i nia i te hoê manuâ rahi, ei tapao no to ratou aroha. Ua na reira atoa te Hau Amerika i na matahiti a'enei, i pohe ai te tonitere Beritane i te fenua ra i Amerika. Ua faaho'ihia to'na tino i nia i te hoê manuâ.

Na te hoê mau taata i Beritane i hamani i te hoê pahi auahi rahi roa. Tei uta te vahi i hamanihia'i taua pahi ra, i te pae o te hoê anavai, o Clyde to'na i'oa; i teie nei râ ua oti roa te pahi, e eita roa te pahi e tae i tua, maoti e fâarahihia taua anavai ra. Ua parauhia e, e ohipa mau'a roa i ore te mau taata hamani pahi i ite e, eita te pahi rahi e haere na taua anavai ra.

I Tarafonia, i te 17 no Tenuare, ua haere te hoê vahine paari roa, e te hoê tane paari atoa hoi, i mua i te hau ma te titau i te parau faatia ia faaipoipohia raua, e ua faatia te hau. E hoê hanere e pae e tiahapa te matahiti o taua vahine, e e vau ahuru te matahiti o te tane. Ua patoi te mau mootua o taua vahine ruau i to'na faaipoiporaa, aita râ te hau i haapeapea ia raua.

I te 17 no Tenuare, ua maitihia e to Farani te hoê peresideni apî, o Raymond Poincare to'na i'oa. E rave rahi te taata tei tamata i te noaa i taua toroa ra, e ia tuu te mau taata maiti i ta ratou mau parau maitiraa, e ua taiohia, ei reira ua iteahia e, tei ia Raymond Poincare e 483 parau maitiraa, e te piti o te taata, o Jules Pams, e 296 parau maitiraa, e te toru o te taata, o Marie Vailland, e 69 parau maitiraa, e no reira ua noaa taua toroa ra ia Raymond Poincare. O te Premier teie taata i maiti-apî-hia, oia hoi te hoê tauturu matamua i te peresideni tahito, o M. Falliers.

Ua inu te hoê taata i te hoê mohina ava, na nia i te faaauraa, e ua pohe atura oia. I teie nei ua tapeahia i te auri te taata, o tei faaaui mai ia'na ia inu i taua ava ra.

Ua rave noa te hoê tamaiti, e hoê ahuru ma hoê o'na matahiti, i te hoê boti hoe na te hoê taata, e ua hauti rii oia i te reira ma te mana'o ore i te opape puai. Na te opape i afai ê atu i taua boti, e ua moe roa taua tamaiti iti. E rave rahi te mau pahi tei imi-haere i tûa, aita râ i iteahia taua tamaiti ra.

Ua haere na tamarii tamaroa toopiti a te hoê ona i te teataraa faaite hoho'a i Niu Ioka, ei reira ua ite ratou i te mau hoho'a o te hoê mau taata eiâ e te haru, e te auauraa o te mau mutoi ia ratou ra. I te mahana i muri iho, ua faahua taua na tamarii i te mau mea ta raua i ite i te teataraa. Ua rave raua i te mau pupuhi a to raua metua, e ua hauti faahua i te teataraa, e te hopea, ua pohe roa te teina, no te mea aore te tuaana i ite e, e ofai tei roto i ta'na pupuhi.

Ua hoo te hoê taata i te tahi mau uupa, mai ta tatou i ite nei. I Beritane te hooraa, e ua afai mai taua taata ra i taua mau manu i to'na fenua i Amerika. I na mahana i muri iho, ua ora te hoê manu e aita hoi i iteahia. I teie nei râ, ua tae mai te parau i taua taata ra, tei faaite mai e, tei Beritane taua manu i moe ra. E hoê ahuru e ma piti mahana i pau mai te mahana i reva ê atu taua manu ra, e tai ai oia i to'na ofaraa tahito i te fenua ra i Beritane.

E toru avae a'enei, ua tama'i na taata ereere toopiti, e ua patiahia te tahi i te hoê tipî, e ua tano roa i to'na mafatu, e ua puta roa. Ua mana'o ihora, e pohe roa taua taata i putahia to'na mafatu; teie râ ua afai-oioi-hia i te fare ma'i, e na te mau taote i tâpû i to'na aau, e ua iriti rii mai i to'na mafatu, e ua rave ratou i te nila e te taura, e au i taua ohipa ra, e ua nila ratou i taua mafatu i puta ra. I teie nei ua ora roa taua taata ra, e te rave noa oia i taua ohipa ta'na i mata'u ra.

No te toetoe iti rahi roa i te oire ra, i Roto Miti (o to matou ia oire), ua peapea rahi roa. Ua paari te pape i roto i te mau auri pape i raro a'e i te fenua, e no te toetoe rahi roa, ua pararî taua mau auri ra. No te toetoe rahi roa, ua paari te pape i roto i te mau auri pape e faa'i ai i te mau umu haamahanahana i te mau fare atoa, e te mau fare rarahi, e te mau haapiiraa tamarii, e aita hoi e ravea ia mahanahana taua mau fare ra. No te toetoe rahi, ua parahi te mau tamarii no te mau haapiiraa ra i to ratou iho mau fare e toru a'e mahana. No te toetoe rahi roa, ua paari roa te mau roto pape, e ua piri te huruhuru e te avae o te mau moora oviri, tei parahi i nia i taua mau roto ra.

Ua oti a'enei te Peresideni apî no te hau Amerika i te maitihia, o Woodrow Wilson to'na i'oa. I te 4 no Mati e haamata'i oia i te haapao i taua toroa ra.

Ua papai mai te hoê taata mai te uiraa e, Ehia tane arahu i pau i te mau pahi auahi rarahi i te mahana hoê? Tera mai te pahonoraa e au. Ua pau i te mau pahi auahi rarahi roa e fatata e 1000 tane i te arahu i te mahana hoê ra. Aore hoi i pau te arahu rahi roa, mai tera te huru, i te mau pahi auahi i to tatou paeau nei.

Ua faaipoipo te teina no te Emepera no Rusia i te hoê vahine, ma te parau faatia ore a to'na tuaana, te Emepera. Ua riri roa te Emepera i to'na teina, e ua faaue ia iritihia to'na mau toroa faehau, e te mau tapao toroa i to'na ahu. Ua faaauhia teie teina ei mono no te Emepera, e ua faaore-atoa-hia taua faaauraa ra i teie nei.

Ua huru hau i teie nei te tama'iraa i ò Turekia ma. Ua tama'i ratou e toru ahuru mahana, e ua pau ia ratou e iva ahuru e ma hitu o te milioni dala (\$97,000,000), e ua pohe, e aore râ ua haaparuparuhia, e maha hanere tausani taata (400,000). Te apoo nei te mau feia toroa a te mau hau rarahi i teie nei, mai te imi i te mau ravea ia faahau i taua mau basileia ra.

I Amerika e 12 matahiti a'enei, ua haavâhia te hoê taata no te taparahi taata, e ua faahapahia oia. Ia tapeahia i te auri e tae noa'tu i to'na poheraa, o te utua ia i faahapahia'i oia. I taua taime ihora, faaite hua maira oia e, aore roa oia i taparahi i te taata, aita râ i faaroohia ta'na parau, e ua tapeahia'tura oia i roto i te fare auri. I teie nei mau mahana, ua iteahia te taata mau o tei rave i taua hara, e na te hau i faaora i taua taata i tapeahia e hoê ahuru ma piti matahiti.

No te peapea rahi roa i Turekia, oia hoi te fenua no te tama'i rahi i teie nei mau mahana, ua horo e na hanere taata Amerika i te fare no te Tonitere Amerika, e te parahi noa nei ratou i reira. Ua matau te mau faehau Turekia ia haapeapea i te mau taata no te mau basileia êê, ia parahi ratou i roto i te aua i paruruhia e te mau reva o te mau basileia rarahi. Ahiri ua haapeapea mai te faehau Turekia i te Tonitere i reira, e aore râ i to'na fare, e aore râ i te mau taata Amerika i reira ra, e riro paha te hau Amerika i te tono atu i te mau manuâ e te faehau i reira, ei paruru ia ratou. E ture atoa teie na te mau basileia atoa ia paruru i to ratou iho mau tonitere, e to ratou iho mau taata, noa'tu te vahi ta ratou i parahi.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.